



Apequteqaat aallaavigalugu oqallisissatut siunnersuutigaara, qanoq ililluni suliffinni sulisut ilorrisimaarnerat annertusisissinnaaneripput napparsimalluni sulinningitsoornerit sapinngisamik appartinniarlugit.

(Inatsisartunut ilaasortaq Anna Wangenheim, Demokraatit)

Demokraatit Inatsisartuni ilaasortaataannut Anna Wangenheim-imut qujanaq uuma pingaartup oqallisissiannngortinneranut.

Alianarpoq, maani nunatsinni napparsimalluni sulinningitsoornerit taama annertutigimmata. Tamatta ilisarimasaraqarput, suliffiminniit napparsimanertik pissutigalugu sivisuumik sulinningiffeqartunik. Sivisuumik timikkut nappaateqarnek pissutigalugu imaluunniit assersuutigalugu uippakajaarnek imaluunniit isumatsassimanerup kingunerisaanik.

Demokraatinut pingaartuuvoq, taassuma unamminartup nutaamik ukkatarineqalernissaa. Napparsimalluni sulinningitsoornerit piioneerutsinneqarsinnaanngillat, kisiannili millisarneqarsinnaalluarput. Tassani tamatta akisussaaqataavugut. Sulisutut innuttaasutulluunniit nalinginnaalluinnartutut inuttut akisussaafigaarput peqqissuunissarput. Sorpassuarnillu iliuuseqarsinnaavugut. Timigissarnerulersinnaavugut. Peqqinnarnerusumik nerisaqalersinnaavugut. Imigassamik aalakoornartulimmik annikinnerusumik imersinnaavugut. Pujortarunnaarsinnaavugut. Taakku suliniutit annikittunnguit inooriaatsitsigut nappaateqalernerit minnerulersissinnaavai, taamaaliornikkullu aamma napparsimalluni sulinningitsoornerit appartissinnaallugit.

Kisiannili aamma pingaaruteqartupilussuuvoq, suliffeqarfiit pisortaasullu sulisut ilorrisimaarnissaannik ukkataqarnissaat. Suliartorneq nuannersuullunilu isumaqartussaavoq; taamaattumik iluaqutaanngilaq, pisortat pitsaanngitsut sulisuminnik tamaviaartitsisarnerat, piarineruppat piarinerunngippalluunniit. Pisortap pitsaasup ilisimaarinnilluarlunilu malugisinnaasariaqarjaa, sulisoq ullormi suliffiusumi suliassanik qanoq annertutigisunik naammassisaqarsinnaanersoq. Tamanna tunngavigalugu pingaartuuvoq pisortat pitsaasuunissaat ukkatarissallugu, sulisut ilorrisimaarnerat annertusineqassappat napparsimallunilu sulinningitsoortarnerit appartinneqassappata.

Politikkikkummi qanoq iliorsinnaavugut? Siullermik Demokraatit isumaqarput, pingaartuusooq, ajornartorsiutip qanoq annertutiginera misissorneqarpat minnerunngitsumillu tassunga suna pissutaanersoq. Aatsaat sukumiisumik misissuinikkut, sooq inuit napparsimalersarnerinut iliuusissamik sanasinnaavugut, qanoq ililluta ajornartorsiut qaangersinnaanerlugu. Misissuineq taamaattoq aaqqiinissamut aallaaviusariaqarpoq, taamaattumillu Naalakkersuisut apererusuppakka misissuinermut taamaattumut pilersaaruteqarnersut?



Tassalu oqallinnermut tassunga isummersuutigigallakkagut.